

HEBERU

Heberu vaġa-foforina guruġari

Mai fefa toretorena tarimana ta tu asi ribana. Tari ġekirani tu Luka na etoreato, tari ġekirani tu Apolos, o Banabas, o Priskila, o Akwila, o Paulo na etoreato ġetoni. Ġutuma ġekirani tu Paulo ġetoni korana fefa tu Paulo ġena fefa tore maġurinai ġetoreato. Mai fefa tu laġani 60 ema 70 fakari nuġanai ta ġetoreato, mo tu Iesu emaseto murinai.

Mai fefai siri baregori tu karoa 1:3; 4:14-16.

Mai fefa etoreato tarimana ġena ura baregona tu, 1) Heberu ekalesiari bene kirari, ekalesia maġurina korikorinai beġene tanu, a Iuda ġeri sene taravaturi ema maġuriri ġerina tu beġene raka-veġita ma ġeri ai asi ma beġene ġenoġoi-iaġo, maġuri vanaġivanāġi asi beġe doġariani garina (2:1; 6:4-6; 10:26); 2) Iesu Keriso bene vaġa-foforia, ġia tu moġoni Barau vetoġana korikori ema foforito tanobarai; 3) Barau ġena Ginitaġo Variġuna Iesu ġenai emoġonito moġa bene vaġa-fofori ginikaua etato.

Mai fefa tu maiġesina eboioġaiato:

1. Vevaġa-riba-iaġi guruġari - karoa 1-10:18
2. Ekalesia tanutanuna maġuriri - karoa 10:19-13:25

Barau ġena guruġa Natuna ġenana

¹ Guinenai, ġaro vovoka e dabara ġutumai Barau na peroveta tarimari ġerina senera evaġa-guruġarito.

² Senaġi toma, mai ġaro dokori ai, tu Natuna ġenana ema vaġa-guruġarato. Barau na dagara mabarari tu Natuna eviniato bene ġaunari. Ema ġia ġenana maki Barau na guba e tanobara eveir-ito.

³ Ġia tu Barau marevana e mamana baregona evaġa-foforiani, ema ġia tu Barau tauġena kavana. Ġia ġena guruġa seġukana na dagara mabarari eġabi-taġorini. Ġia tauġena na ġera rakava ġuriġivaġiri dabarana evei-ġitakauato murinai, Barau Iaru-korokoro aroribanai ea tanu-tarito gubai.

Barau Natuna tu barego vedaurea, aneru maki evanaġirito

⁴ Barau na Natuna tu etore-varaġeato, aneru evanaġirito. Korana tu arana eviniato maki varaġe lelevaġina, aneru arari evanaġirito.

⁵ Korana Barau na aneru ta tu asi ekiraiato, ekirato,

“Ġoi tu au Natugu,
toma au tu ġoi Tamamu ai baiaġo.”

O maiġesi maki asi ma ekiraiato, ekirato,

“Au tu ġia Tamanai baiaġoni,
ema ġia maki au Natugu ai beiaġoni.”

⁶ Ema Barau na Natuna guinena tanobara ġana ma beġori-iaġomaiani nai tu bekirani,

“Barau ġena aneru mabarami na boġono tomarakariġo vinia.”

⁷ Aneru ekiraġirito nai tu ekirato,

“Barau na ġena aneru eveirito iavara kavana,
ġena vetuġunaġi tarimari karava emoreni noġa.”

⁸ Senaġina Natuna ekiraġiani tu ekirani,

“Barau o, ġoi ġemu Vere dagina tu betanu-vanaġi
 vanaġini,
 ġemu Basileia tu ma iobukaiobukamu ġesi oġori-
 kauani.

⁹ Vei-iobukaiobuka tu oura-vinirini,
 ma veiġa rakavari tu asi oura-vinirini.

Moġa lorinai, Barau o,
 ġemu Barau na maki karomu fakari ai ġoi eġabi-
 viriġimuto,
 debamu ai diġa esisiato,
 iaku na evaġa-vonumuto.”

¹⁰ Ema ma ekiraiato, ekirato,

“Vere o, tovotovonai tu
 ġoi na tanobara oveiato,
 ema guba maki ġoi ġimamu veiveina.

¹¹ Ġia tu beġe korini,
 senaġi ġoi tu botanuni;
 mabarari dabuġa kavana beġe rakavani.

¹² Ġoi na koudi noġa boiokurini,
 dabuġa kavana vetoġari beġe irauni,
 senaġi ġoi vetoġamu tu asi beirauni,
 ema ġoi ġemu maġuri laġaniri maki
 asi beġe magoni.”

¹³ Barau na aneru ta maki asi ekiraiato,
 “Aroribagu ai noma tanu,

bene iaġo mo, ġoi ġevetari-vinimuni tarimari ġoi
 kwakumu fanakauna dagananai batore-
 taririni.”

¹⁴ Aneru mabarari tu vetuġunaġi iaukari moġo,
 Barau na etuġurito deikara vevaġa-maġuri beġe
 ġabiani tarimari vaġa-kavari ġana.

2

Vevaḡa-maḡuri baregona

¹ Moḡa lorinai kara taseḡaḡirito guruḡari tu tana ḡabi-gigitariri, asi namo ḡerana beḡe rek-warekwani, benamo taiāḡo-viniani gabuna bita leaiani.

² Korana aneru na ḡita senera ḡeri ḡevari-fiurito guruḡari tu moḡoni veḡata, ma mo guruḡa moḡeri ḡekira-sirivaḡi-iaḡirito e asi ḡekorana-iaḡirito tarimari tu ḡeri vei-rakava ilailari ai met-ona ḡeḡabiato,

³ a ḡita tu kamasi bita raga-maḡurini, bema mai vevaḡa-maḡuri baregona bita ḡita-ḡuirāḡiani nai tu? Mai vevaḡa-maḡuri tu tovotovonai Vereḡauka tauḡena na evari-fiuato. Moḡa murinai tu ḡeseḡaḡiato tarimari na ḡai ḡema-kiravaramato mo tu moḡoni.

⁴ Barau na maki evaḡa-moḡoniato vetoḡa boruri ai, e nuḡa-farevaḡi veḡari ai, e seḡuka veḡari boruri dabara iraurauri ai, ema Iauka Veāḡa ḡena varevare dagarari na. Mo Iauka Veāḡa ḡena varevare dagarari tu Barau ḡena ura lorinai veḡabidadama tarimari evinirito.

Iesu na vevaḡa-maḡuri gabuna ḡana eḡori-iaḡorani

⁵ Mo tanobara beiaḡomani ḡai na ḡakiraḡiani tu Barau na dia aneru ḡeri veḡitaḡau gaburenai etoreato.

⁶ Senaḡina Buka Veāḡa nuḡanai gabu tai tarima ta evarifiuto, ekirato,
 “Barau o, tarimarima tu dei,
 be ḡoi na otuḡamaḡi-gwaḡiḡiani?”

O Tarimarima Natuna tu dei,
be ġoi na oraka-ġitaiani?

⁷ Ġoi na kota otore-variġoato aneru gabureri
ġana;

murinai mareva baregona e vegubakau koro-
nana ġenai otore-kauato,

⁸ ema dagara mabarari ġia kwakuna gaburenai
otorerito.”

Korana Barau na dagara mabarari tu ġia ġena
veġitaġau gaburenai etorerito. Moġoni, Barau
na dagara ta tu asi etore-ragakwaneato, ġia ġena
veġitaġau gabuna murikanai. Senaġina maitoma
dagara mabarari tu dia ġia ġena veġitaġau gabu-
renai taġitarini.

⁹ Senaġi Iesu taġitaiani, ġia tu Barau na mo faka
kotunai etore-variġoato aneru gabureri ġana,
korana Barau ġena varevare-bara ġenana tari-
marima mabarari urari ai bene mase. Toma
Iesu tu taġitaiani, iatanai Barau na mareva e
vegubakau baregona etore-kauato, korana tu
midigumidigu ai emaseto.

¹⁰ Dagara mabarari eveirito e eġaunarito Ba-
rauna, ġena ura tu Iesu roġo midigumidigu
ġenana asi vetoukaunai bene iaġo-guine. Moġa
murinai vauro natuna ġutumari ma bene ġori-
iaġomari, benamo ġia marevana e mamana
baregona beġene ġabia. Barau ġenai dabara
roroġotona sebona tu moġa moġo. Korana Iesu
tu Barau natuna ġeri vevaġa-maġuri tarimana
baregona.

¹¹ Tarimarima evaġa-veaġarini tauna, Iesu,
ema Iesu na evaġa-veaġarito tarimari Tamari

tu sebona. Moġa lorinai Iesu tu asi emaiakiani mo evaġa-veaġarito tarimari ekiraġirini ġia tarikakana.

¹² Ġia na Barau ekiraiani, ekirani,
 “Ġoi aramu tu au tarikakagu ġeri ai bakiraġi-foforiani;
 ekalesia nuġanai ġoi mari ai bavonevone-raġemuni.”

¹³ Ma ekirato,
 “Barau ġenai haveġabidadamani.”
 Ema ma ekirato maki,
 “Au tu maiġegu Barau na eviniguto doġorona natuna ġesi.”

¹⁴ Korana Barau natuna mabarari tu ma viriġori e ma rarari nai, ġia tauġena maki ġia ilailari ai eiaġoto. Moġesi eveito korana tu, ġena mase ġenana mase seġukana eġabi-taġoani tarimana, Diabolo, bene vaġa-rakavaia ġana.

¹⁵ Ema tarimarima deikara ġeri maġuri nuġanai mase garina na eġuġuvirito bene vaġa-maġuriri ġana.

¹⁶ Moġoni, Iesu na tu dia aneru evaġa-kavarito, senaġi Aberahamo besena.

¹⁷ Moġa lorinai Barau na Iesu tu dabara mabarari ai tarina doġoro ilailari ai eveirito. Korana mo dabarai vau vevetuġaġwa e vetuġamaġikau Rubu Veaġa verena baregonai beiġoni. Ema Barau vetuġunaġina beiġo-vinini, tarimarima ġeri rakava na bene voi-vaġiri ġana.

¹⁸ Korana Iesu tauġena na veribaġani midigumidiguna mamina eġabiato, toma kamara deikara veribaġani beġoitaġoni nai tu bevaġa-kavaiani riba.

3

Iesu ġena seġuka na Mose ġena seġuka evanaġiato

¹ Moġa lorinai, tarikakagu veaġami, ġomi tu Barau na ekeamito guba na. Ġemi tuġamaġi boġono tore-gwaġiġia Iesu ġenai. Ġia tu Barau na etuġuato Rubu Veaġa verena barana. Ġita na tu ġia takiraġi-foforiani.

² Iesu tu Barau na evaġa-ruġaiato Rubu Veaġa verena. Ema ġia tu ma ġena vetuġamaġikau Barau ġenai, ilailana Mose ma ġena vetuġamaġikau Barau ġena numai kavana.

³ Numa eragaiani tarimana tu ġegubakau-baregoani, a eveiani numana tu ġegubakau-keiani. Moġesi kavana Barau na Iesu tu mareva baregona eviniato, Mose na eġabiato marevana evanaġiato.

⁴ Numa mabarari tu ma ragaragari tarimari, senaġina dagara mabarari veiveiri tu Barau ġereġana.

⁵ Mose tu vetuġunaġi-iaġovini tarimana, ġia ma ġena vetuġamaġikau Barau ġena numai. Ema ġena ġauvei tu ġoirai Barau na kara bekiraġirini guruġari ekiraġi-foforirito-ġoi.

⁶ Senaġina Keriso, Barau Natuna, tu Barau ġena numa eġita-ġauani. Ġita tu ġia ġena numa, bema ma kokorera e ma iakura ġesi taveiavi-iaġiani tuġamaġikaunai bita veġabi-gwaġiġini beiaġoni mo magona.

Barau ġena tarimarima ġeri iaġaraġi

⁷ Moġa lorinai Iauka Veaġa ekirani kavana bitana vei, maiġesi ekirani,

“Toma bema Barau garona boḡo seḡaḡiani nai tu,
 8 nuḡami asi boḡono vaḡa-gwaḡiḡi foroforori,
 senemi tanobara fakanai veribaḡani ḡaronai
 ḡeseḡaforeto kavana.

9 Oba, tamami na laḡani gabana vasivasi (40)
 tanobara fakanai ḡegu ḡauvei ḡeḡitaiato,
 senaḡina ḡeribaḡaniguto e ḡevaḡa-uraguto.

10 Moḡa lorinai mo bese abaru-vinirito,
 benamo akirato, ‘Ḡia nuḡari tu vanaḡivanaḡi au
 ḡeguna ḡeveḡitani,
 ema au ḡegu veiḡa maki asi ḡeribarini.’

11 Moḡa lorinai ma barugu ḡesi aguruḡa-foforito,
 ‘Ḡia au ḡegu iaḡaraḡi ai tu asi beḡe raka-toḡani.’ ”

12 Tarikakagu mabarami, boḡono venari. Asi
 namo tarikaka ta ḡomi fakami ai loruna ḡutunai
 vei-rakava betanuni, ema Barau ḡena guruḡa
 asi bevaḡa-moḡoniani, benamo maḡuri Barauna
 ḡenana beraka-veḡitani.

13 Toma mai ḡaro maiḡa Barau ekirani,
 “Tomaḡaro” etoni ḡiranai, karomi tata ḡesi
 boḡono velaunaḡi, be vei-rakava ḡena ḡofaḡofa
 na ta nuḡamu asi bene vaḡa-gwaḡiḡia.

14 Ḡita tu Keriso ḡesi tasebonato, bema tovo-
 tovonai taḡabi-raḡeato veḡabidadamana moḡa
 bita ḡabitari-gwaḡiḡiani beiaḡoni mo magona.

15 Buka Veḡa ekirani kavana,
 “Tomaḡaro ai bema garona
 boḡo seḡaḡiani nai,
 nuḡami asi boḡono vaḡa-gwaḡiḡiri,
 guinenai ḡomi senemi seḡafore ai ḡeveito ka-
 vana.”

16 Dei na tu Barau garona ġeseġaġiato, senaġi ġena guruġa ġekira-fitoġarito, benamo ġevaġa-baruato? Mo tu Mose na Aigupito na eġori-rosirito tarimari mabarari, ene?

17 Ema deikarari tu Barau na mo laġani gabana vasivasi (40) nuġanai ebaru-vinirito? Tarimari tu moġeri, rakava ġeveito, benamo tano fakanai ġeketoto, benamo ġemaseto, ene?

18 Ema Barau na tu deikarari ekirarito, ekirato, “Au ġegu iaġaraġi gabunai tu asi beġe raka-toġani.” Ġeseġaforeto tarimari ekirarito, ene?

19 Moġa lorinai ġita taribani, ġia tu asi ġeraka-toġato, korana Barau asi ġevaġa-moġoniatto-ġoi nai.

4

1 Barau ġena iaġaraġi ai bita raka-toġani gu-ruġatorena tu roġo eruġa-taġoni. Moġa lorinai bitana venari, ġita fakarai ta mo iaġaraġi ai asi beraka-toġani garina.

2 Korana mo Vari Namona ġita ġera ġeġobata-iaġiato tu Isaraela tarimari ġeri maki ġeġobata-iaġiato. Senaġi mo guruġa ġeseġaġirito ġerina namo ta asi ġeġoitaġoato, korana tu ġeseġaġirito moġo, ma asi ġevaġa-moġonirito.

3 Senaġi ġita Barau tavaġa-moġoniani tarimara tu, mo iaġaraġi ai bita raka-toġani ġena guruġa ilailanai, ekirato,

“Au ġegu baru ai kiraġitore guruġana gwaġiġina akiraġi-foforiato, akirato,

‘Au ġegu iaġaraġi ai tu asi beġe raka-toġani.’ ”

Moĝoni, Barau tu moĝesi ekirato, senaĝina ĝia na tanobara eveiato nai, ĝena ĝauvei mabarari tu varau evaĝa-koririto.

⁴ Gabu tai Buka Veaĝa nuĝanai ĝaro vaĝa-imaima ruaruana (7) ekiraĝiato nai tu, maĝesina ekirani, “Ĝaro vaĝa-imaima ruaruanai (7) Barau tu ĝena ĝauvei mabarari ĝerina eiaĝaraĝito.”

⁵ Ema mai vau bita kiraĝia gabunai maki ekirato, “Ĝia au ĝegu iaĝaraĝi ai tu asi beĝe raka-toĝani.”

⁶ Senaĝina tari mo iaĝaraĝi ai beĝe raka-toĝani guruĝatorena tu roĝo eruĝani gabunai. Ma Isaraela tarimari, Vari Namona ĝeseĝaĝi-guineato tarimari, tu mo iaĝaraĝi ai asi ĝeraka-toĝato, korana tu ĝeseĝaforeto nai.

⁷ Moĝa lorinai Barau na ĝaro ta ma eĝabiviriĝiato, “Tomaĝaro” ekiraĝiato. Ma laĝani vovoka ĝekorito murinai, Barau, Davida ĝenana maĝesi eguruĝato, ekirato, “Toma, bema Barau garona boĝo seĝaĝiani nai, nuĝami asi boĝono vaĝa-gwaĝiĝiri.”

⁸ Bema Iosua na iaĝaraĝi bere viniri, Barau na moĝa murinai iaĝaraĝi ĝarona ta tu asi ma bere kiraĝia.

⁹ Moĝa lorinai Barau ĝena tarimarima ĝeri iaĝaraĝi tu roĝo ĝoirai eruĝa-taĝoni.

¹⁰ Korana Barau ĝena iaĝaraĝi ai eraka-toĝani tarimana tu ĝena ĝauvei na eiaĝaraĝini, ilailana Barau ĝena ĝauvei na eiaĝaraĝito kavana.

¹¹ Moĝa lorinai sikokore, Barau ĝena iaĝaraĝi ai tana raka-toĝa uranai. Ma ĝita fakarai ta asi bene keto, guinenai ĝeseĝaforeto tarimari kavari.

¹² Barau ġena guruġa tu maġuri e ma seġukana. Matana maki raga-rakava, vetari baġana ta matana ruarua maki evanaġiato, erakatoġa-korikorini maġuri ma iauka vekaravarina, ema turiġa komukomuri ruarua ġeraga-sebonato vekaravarina. Tarima loruna ġutuna ġena ura e tuġamaġi maki eriba-viriġiani.

¹³ Barau na eveirito dagarari mabarari tu ta asi vekuretoġa ġia matana. Ema ġia ġoiranai ġita mabarara ġera maġuri bita vari-fiurini.

Iesu Rubu Veaġa verena barego vedaureana

¹⁴ Barau Natuna Iesu tu ġita ġera Rubu Veaġa verena barego vedaureana; ġia tu guba erakavanagiirito. Moġa lorinai ġera veġabidadamai tana veġabi-gwaġiġi. Mo tu ġita na takiraġi-foforiani veġabidadamana.

¹⁵ Ġita ġera Rubu Veaġa verena baregona tu ġita ġera moiramaira ġia na maki emami-raġirini. Korana tu ġia maki ġenai veribaġani irauirau mabarari ġefoforito ġita ġerai kavana. Senaġi ġia tu asi evei-rakavato.

¹⁶ Moġa lorinai ma kokorera ġesi Barau ġena namo e varevare-bara terona ġana siraka-kavi-iaġo. Monai Barau ġena vevetuġaġwa bitana ġabia, ema ġena varevare-bara tana ġoitaġoa, be bita ura-viniani nai, bene vaġa-kavara.

5

¹ Rubu Veaġa vereri baregori mabarari tu tari-marima fakari na Barau na eġabi-viriġirito, benamo evaġa-ruġarito, tarimarima arari ai Barau ġena ġauvei beġene veia ġana. Ġia ġeri ġauvei tu

tarimarima ġeri rakava voi-vaġiri ġana varevare dagarari Barau beġene vinia ema boromakau, mamoe, e manu beġene vaġiri, benamo beġene gaburi, Barau na bonari bene noġori ġana.

² Rubu Veaġa verena baregona tauġena maki ma ġena moira gaburi, naima ġia na asi ribari tarimari ema Barau ġena dabara na ġerakaveġitani tarimari bevetuġa-ġwarini riba.

³ Ġia tauġena maki ma ġena moira lorinai, ġia na rakava voi-vaġiri varevareri tu ġia ġena evinini, ema tarimarima ġeri maki evinini.

⁴ Rubu Veaġa verena baregona dagina eġabini tarimana tu arana barego. Tarima ta na mai ginitaġo ġauveina tauġena na asi beġabi-kavaiani, senaġi ġia tu Barau na bene keaia vau, vaġailailana Arona ekeaiato kavana.

⁵ Keriso maki moġesi, dia tauġena eveġabivarage to Rubu Veaġa verena baregonai eve-toreto, senaġina Barau na evaġa-ruġaiato, ekiraiato, ekirato,

“Ġoi tu au Natugu,
toma au tu ġoi Tamamu ai baiaġo.”

⁶ Gabu tai maki ekirani,
“Ġoi tu Rubu Veaġa verenai
botanu-vanaġi vanaġini
Melkisedek kavana.”

⁷ Iesu tanobarai etanuto-ġoi ġarori ai tu ma taġi-koġokoġona ema matana ma nanuri ġesi Barau ġenai eġuriġurito-ġoi, ema enoġi-raġeto-ġoi. Korana tu Barau na ġereġana na moġo mase ġenana bevaġa-maġuriani. Barau na eseġaġiato, korana tu ma vegubakauna ġesi Barau garina eveito-ġoi nai.

8 Ĝia tu Barau Natuna, senaĝi ĝena midigu-midigu na vau seĝaĝi dabarana eribaiato.

9 Enamo-vedaureato murinai vau, ĝia beĝe seĝaĝi-viniani tarimari mabarari ĝeri maĝuri vanaĝivanaĝi vaĝa-ĝorana tarimanai eiaĝoto.

10 Ema Barau na evaĝa-ruĝaiato Rubu Veaĝa verena baregona Melkisedek kavana.

Asi boĝono mero-kaukau

11 Ĝia varina tu vovoka bita kiraĝirini, senaĝina moĝeri kiraĝi-viriĝiviriĝiri tu gwaĝiĝi, korana ĝomi tu asi ĝotuĝamaĝi-faka ĝarimoĝini.

12 Mai nega mainai ĝomi tu vevaĝa-riba tari-mami ai ĝoro iaĝo, be ĝoro vevaĝa-riba-ĝoi. Senaĝina ĝomi tu roĝo ĝourani ta na Barau ĝena guruĝa moĝoniri korari na ma bene vaĝa-ribami ĝotoni. Gomi tu roĝo lata ĝourani, ĝaniĝani gwaĝiĝiri tu asiĝina.

13 Deikara lata roĝo eruruni tu roĝo mero keina. Ĝia tu veĝa iobukaiobukari ema veĝa asi ro-roĝotori vetoĝari tu roĝo asi ribana.

14 A ĝaniĝani gwaĝiĝiri tu tarima baregori ĝari. Ĝia na tu ĝeĝauvei-iaĝi vanaĝivanaĝirini. Ĝeĝauvei-iaĝirini ĝarori ai tu tauĝeri maki ĝevevaĝa-ribani namo e rakava vetoĝari beĝene ĝita-leari ĝana.

6

1 Moĝa lorinai namona tu Keriso ĝena vevaĝa-riba guruĝari tovtovonai riba guineri ĝeĝorani dagarari tu si-iaĝuiri. Benamo ĝia ĝena vevaĝa-riba baregori ĝana si-iaĝo. Tovtovonai riba guineri ĝeĝorani dagarari moĝo asi bitana

vevaḡa-riba-iaḡi ḡenoḡoi-ḡenoḡoiri. Mo tu veirakava ḡerina tuḡamaḡi-kure ma raka-kure e Barau ḡenai veḡabidadama.

² Babatiso vevaḡa-ribari e ḡima tarima iatari ai torekau, mase na varigisi-ḡenoḡoi e vevaḡa-roroḡoto vanaḡivanaḡi.

³ Moḡa tu bita veiani bema Barau na bevaḡa-moḡoniani nai.

⁴ Bema tarima ta ḡena veḡabidadama beraga-kwaneani tu, kamara dabarai ma bevetuḡamaḡi-kureni? Ḣia nuḡana tu evaḡa-mamaiato, ema guba na eiaḡomato varevarena emami-tovoato, ema Iauka Veaḡa maki eḡabiato.

⁵ Ema Barau ḡena guruḡa namona edoḡariato e vau ma beiaḡomani tanobarana seḡukari maki emamirito.

⁶ Bema ḡia veḡabidadama na ma beketo-veḡitani, ḡia tu Barau Natuna ma evaḡa-satauro ḡenoḡoiani, ema ḡutuma barai ma etore-rosiani e evaḡa-maiakaiani. Ḣia ma novaḡa-vetuḡamaḡi-kurea ḡana tu asi dabarana ta.

⁷ Ḣaro vovoka ḡura eraguni, benamo tano na mo naḡu erimaiiani. Benamo bema mo tano iatanai ḡevaroni tarimari ḡari ḡaniḡani namori bevaḡa-ḡorarini nai tu, Barau na mo tano namo beviniani.

⁸ Senaḡina ḡau ma giniri ema ḡauḡa ma ḡiniginiri evaḡa-ḡararini tanona tu asi ḡena namo; Barau na mo tano bekiraḡiani tu tano rakavana, ema dokonai tu begabuani.

⁹ Ḣatagu mabarami, moḡoni, maiḡesina ḡavaḡa-guruḡa ḡwaḡiḡimini, senaḡina ḡatuḡamaḡi-

gwaḡiḡini, ḡomi tu namo baregona ema vevaḡa-maḡuri boḡoa ḡoitaḡoani.

¹⁰ Barau ḡena veḡa tu asi ḡeḡeva. Barau ḡemi ḡauvei ema ḡia arana ḡoura-viniani nai, ḡena tarimarima ḡovaḡa-kavarito ema initoma roḡo ḡovaḡa-kavarini tu asi betuḡa-rekwarini.

¹¹ Ḡai ḡema ura baregona tu ḡomi tata maniḡesi moḡo boḡono ḡauvei-kokore-iaḡo, ḡemi tuḡamaḡikau beḡenea moḡoni bene iaḡo mo dokonai.

¹² Be asi beḡene ḡubulefimi, senaḡina mo tarimarima ḡeri veḡabidadama e ḡeri vevaḡa-gwaḡiḡi ḡerina mo kiraḡitore ḡeḡabiani, boḡono tovo-tovori.

Barau ḡena kiraḡitore

¹³ Barau ḡena kiraḡitore guruḡana Aberahamo ḡenai eveiato tu tauḡena aranai eguruḡa-toreto, korana tu tarima ta ma asi varaḡe ḡia iatanai, aranai beguruḡa-toreni lorinai.

¹⁴ Ekirato, “Moḡoni, ḡoi tu bavaḡa-namomuni ema besemu ḡutuma bavanimuni.”

¹⁵ Benamo Aberahamo evevaḡa-gwaḡiḡito, asi eḡubulefito mo Barau na ekiraḡi-torerito dagarari ḡenai ḡefoforito.

¹⁶ Tarimarima guruḡatore gwaḡiḡiri mabarari ḡeveini nai tu, tarima baregona ta ḡia iatarāḡeri ai aranai ḡeguruḡa-toreni. Monana mo guruḡa-tore guruḡana gwaḡiḡina evaḡa-moḡoniani, benamo veḡareveḡare guruḡari mabarari elauḡaurini.

¹⁷ Guinenai Barau ḡena kiraḡitore tu guruḡatore guruḡana gwaḡiḡinai eveiato. Korana ḡia ḡena ura ḡia na kiraḡitore beḡe ḡaunaiani

tarimari beġene riba-ginikau, ġia ġena kiraġitore tu asi bevekefoni.

¹⁸ Mo guruġatore ruarua tu beġe tanuni, asi beġe vekefoni. Ema mo dagara ruarua ġerina ġita taribani, Barau tu asi beġofaġofani riba. Be ġita deidei rakava ġenana taraga-veġitato, benamo Barau ġenai taiāġomato tarimara tana kokore-korikori, be mo tuġamaġikau ġoirarai eruġataġoni tana ġabia.

¹⁹ Mo tuġamaġikau taġabiato tu ġita ġera maġuri eġabi-tariani dagarana. Mai tuġamaġikau tu moġonina e asi eirauni. Ġia tu vekouġau dabuġana na murina ġana eraka-toġani, eiaġoni mo, veaġa lelevaġi daġutuna nuġana ġana.

²⁰ Mo ġana tu Iesu eiaġo-guineto ġita bene vaġa-maġurira uranai. Ġia tu Melkisedek ġena dabarai Rubu Veaġa verena baregonai betanuvanaġi vanaġini.

7

Melkisedek tu Rubu Veaġa verena baregona

¹ Mai Melkisedek tu Salem vanuġa barana verena, ema ġia tu Iaru-korokoro Barauna ġena Rubu Veaġa verena. Ġia na Aberahamo edoġariato, vanuġa barari ġeri vere baregori o kini tari vetari ai evaġirito, benamo eġenoġoito-ġoi nuġanai, Aberahamo evaġa-namoato.

² Ema Aberahamo na vetari ai eġabirito farefareri, karava gabanana (10) eveirito, benamo karava ta Melkisedek eviniato. Melkisedek arana

anina giniguinena tu “Veigā Iobukaiobuka Verena”, ma arana ta tu “Salem Verena”, moġa anina tu “Maino Verena”.

³ Ġia asi tamana, asi sinana, asi besena ta, ema ġena maġuri evesinato ġarona e ġena maġuri emagoto ġarona maki asiġina. Ġia tu Barau Natuna kavana etanuni, Rubu Veaġa verena vanaġivanaġi.

⁴ Melkisedek ġoġitaia, ġia tu tarima arana barego lelevaġi, korana Aberahamo tu senera baregona na maki vetari ai eġabirito farefareri karava gabanana (10) ġerina ta ġia eviniato.

⁵ Taravatu ekirani, Levi besena Rubu Veaġa verena dagina beġe ġabiani tarimari tu karava gabanana ġerina ta beġene gogo Isaraela tarimari ġerina, mo tu tarikaka ġerina. Moġoni, tarikakari maki Aberahamo ġena bese tarimari, senaġina ġia ġerina beġene gogo.

⁶ Melkisedek senena tu dia Levi ġenana eiaġomato, senaġina Aberahamo ġenana karava ta eġabiato. Ma ġia na Barau ġena kiraġitore eġabiato tarimana evaġa-namoato.

⁷ Asi bita daradara-iaġiani, tarima baregona na tarima keina vevaġa-namo eviniani.

⁸ Levi senena, karava gabanana ġerina ta ġeġabiato doġorori, tu ma ġemaseto-ġoi. A Melkisedek na maki karava ta eġabiato, senaġi ġia tu Buka Veaġa na ekiraġiani asi emaseto.

⁹ Benamo maiġesi ma nakira, Levi maki karava gabanana ġerina ta ġeġabiato-ġoi tarimana. Ġia na Aberahamo ġenana Melkisedek karava ta ma evini-ġoiato.

10 Korana Melkisedek na Aberahamo eḡoitaḡoato ḡaronai tu, Levi tu roḡosi roḡo bene maḡuri, roḡo ḡatana Aberahamo tauḡaninai.

Iesu tu Melkisedek kavana

11 Guinenai Barau na Isaraela tarimari taravatu evinirito. Mo taravatu ekirani, Levi besena na ginitaḡo veaḡa ḡauveina beḡene veia. Senaḡi bema Levi besena ḡeri Rubu Veaḡa verena ḡenana e ḡeri ḡauvei seḡukana na mo namo vedaurea beḡere ḡabia nai tu, kara dainai Barau tu ma ekirato, Rubu Veaḡa verena ta ma betuḡuani Melkisedek ilailanai, ma dia Arona kavana?

12 Korana bema ginitaḡo ḡauveina ḡeveiani tarimari ḡeri doḡoro ḡesenisito nai tu, taravatu maki besenisini.

13 Korana Iesu mai takiraḡiani tarimana tu irau doḡoro. Ġia ḡena doḡoro tarimana ta fata veaḡana iatanai ginitaḡo ḡauveina asi eveito.

14 Korana ribara, ḡita ḡera Vereḡauka tu Iuda besena na emaḡurito. Ma Mose na Rubu Veaḡa vereri ekiraḡirito-ḡoi nai tu, Iuda doḡorona tu asi ekiraḡiato.

15 Ema kara bita kiraḡia toma tu bita ḡitafakaginikauani, korana Rubu Veaḡa verena ta ma befofori Melkisedek kavana.

16 Ġia tu dia senena kavari, taravatu seḡukanai Rubu Veaḡa verenai eiaḡoto, senaḡina maḡuri vanaḡivanaḡi ḡenana eiaḡomani seḡukana na Rubu Veaḡa verenai eiaḡoto.

17 Korana Barau na maḡesi ekiraiato, ekirato, “Ḡoi tu Rubu Veaḡa verenai botanu-vanaḡi vanaḡini Melkisedek kavana.”

18 Mo taravatu guinena tu etore-veġitaiato, korana ġia tu asi seġukana ema asi bevevaġa-maġurini riba.

19 Korana Mose ġena taravatu na dagara ta tu asi evaġa-namo vedaureaiato. Moġesina naima Barau na tuġamaġikau lagilagina ta ma etore-rosiato, moġa ġenana ġita Barau sevina ġana bita raka-kavini.

20 Barau na Iesu tu guruġatore guruġana gwaġiġina eveiatio vau, Rubu Veaġa verenai etore-ato! A Rubu Veaġa vereri mabarari ġeri ai tu guruġatore ta asi eveiatio.

21 Senaġi Iesu Rubu Veaġa verenai eiaġoto tu Barau na guruġatore gwaġiġina eveiatio vau. Barau na maġesi ekiraiato,

“Vereġauka tu eguruġa-foforito

ma ġena tuġamaġi asi ma bekefoani:

‘Ġoi tu Rubu Veaġa verenai botanu-vanaġi vanaġini.’ ”

22 Mai guruġatore guruġa gwaġiġina lorinai, Iesu tu ginitaġo variguna ma namona korikori vaġa-moġoninai eiaġoto.

23 Guinenai Rubu Veaġa vereri tu vovoka, korana tu ġemaseto-ġoi, be ta Rubu Veaġa verenai asi etanu-rovaġito.

24 A Iesu tu etanu-vanaġi vanaġini lorinai, ġia tu Rubu Veaġa verenai betanu-rovaġini.

25 Moġa lorinai deikara ġia ġenana Barau ġenai beġe iaġoni tu bevaġa-maġuririni riba. Korana Iesu tu ġia urari ai Barau ġenai bene ġauġau ġana etanu-vanaġi vanaġini.

²⁶ Maiġesi Rubu Veāġa verena baregona na ġita ġera ura dagarari evinirani. Ġia tu veāġa, asi ġena vei-rakava, vetoukau ta ġenai asiġina, namo vedaurea; ġia tu vei-rakava tarimari kavana asiġi. Ma Barau na guba tuġuna korikorinai ea toreato.

²⁷ Ġia tu dia guinenai Rubu Veāġa vereri baregori kavana, ġaro korikoriri ai varevare dagarari bevinini. Guine tu ġia ġena vei-rakava Barau na bene tuġamaġi-fitoġari ġana evinito, ma moġa murinai tu tarimarima ġeri rakava Barau na bene tuġamaġi-fitoġari ġana. Ġia tu vaġa-sebona moġo tarimarima ġeri vei-rakava ġana ginitaġo varevarena eviniato. Moġa tu ġia tauġena ginitaġo varevarenai eiaġoto, benamo Barau ġenai evevini-raġeto.

²⁸ Mose ġena taravatu na tu ma ġeri moira tarimari Rubu Veāġa verena baregonai etoreritogoi. Senaġina Barau ġena guruġatore guruġana gwaġiġina, Mose ġena taravatu murinai ema foforito dagarana, na tu Barau Natuna evaġa-ruġaiato. Ġia tu Barau na evaġa-namo vedaurea-iato, ma namo vedaurea betanu-vanaġi vanaġini.

8

Iesu tu ġita ġera Rubu Veāġa verena baregona

¹ Ġai na kara ġakiraġiani tu maiġa. Ġita tu ma ġera Rubu Veāġa verena baregona. Ġia tu gubai Iaru-korokoro Barauna ġena terona aroribanai etanu-tarito.

² Barau ġena veāġa gabuna nuġanai eġauveini. Mo tu farai rubuna korikori Vereġauka na eraga-iato, dia tarimarima na ġeraga-iato.

³ Rubu Veāga vereri baregori mabarari tu ġevaġa-ruġarito, varevare dagarari ema boro-makau, mamoe, manu beġene vini ġana. Moġa lorinai mai Rubu Veāga verena baregona, Keriso, maki ma ġena dagara tari, bene vini ġana.

⁴ Bema ġia tanobarai bere tanu tu, Rubu Veāga verenai asi bere iaġo, korana tu maiġa, Rubu Veāga vereri tu varau ġetorerito maiġeri, varevare dagarari ġevini-tanuni, Iuda ġeri taravatu ekiraġiato ilailanai.

⁵ Ġia varevare dagarari mainai veāga lelevaġi daiġutunai ġevinini tu, gubai mo veāga lelevaġi daiġutuna kavana e vetoġana moġo. Moġesina nai Barau na Mose toma-rakariġo ġana farai rubuna bene ragaia ġana, naima ekira-toreġauato, ekirato, “Bono ġitaia, dagara mabarari boveirini nai tu, ġoro ai avaġa-ġitamuto ilailanai moġo bono veiri.”

⁶ Senaġina toma Iesu na ġinitaġo varevareri vini-toreġau veiġana guinenai Rubu Veāga vereri ġeri ġauvei evanaġiato. Korana Barau ġena kiraġitore variġunai Iesu tu Barau e tarimarima vekaravari ai eruġani, ġinitaġo variġuna bene vaġa-seġukaia ġana, ma mai ġinitaġo na mo ġinitaġo guinena seġukana evanaġiani. Ema Barau ġena kiraġitore variġuna na mo ġinitaġo guinena kiraġitorenna maki evanaġiato.

⁷ Bema mo ġinitaġo guinena asi ġena rakava tu, Barau na ġinitaġo variġuna ta asi ma bere kiraġia.

⁸ Senaġina Barau na tarimarima ġeri ai rakava eġoitaġoto naima ekirato,
 “Vereġauka eguruġa-foforini,
 ‘Boġono seġaġi, ġaro ta mani eiaġomani,

au na ginitaḡo variḡuna ta ma haveiani,
Isaraela besena e Iuda besena ḡeri.

⁹ 1 Mai ginitaḡo tu dia guinenai ḡia seneri ḡeri
aveiato moḡa kavana.

Dia mo ḡaro ai ḡimari ai aḡabito,
benamo Aigupito na aḡori-rosirito ginitaḡona ka-
vana.

Korana ḡia tu au ḡegu ginitaḡo ḡenai
asi ḡevetuḡamaḡikauni naima,
au na araga-kwanerito,’

Vereḡauka tu moḡesina eguruḡani.

¹⁰ Vereḡauka ma ekirani,

‘Ḡoira ḡarori ai au na mai ginitaḡo Isaraela besena
ḡeri ma haveiani:

Au ḡegu taravatu ḡia debari ai batore-toḡarini
ema ḡia nuḡari ai batorerini.

Au tu ḡia ḡeri Barau ai baiaḡoni ema ḡia maki au
ḡegu tarimarimai beḡe iaḡoni.

¹¹ Tarima ta na sevinai etanuni tarimana asi ma
bevaḡa-ribaiani,

ema tarima ta tarikakana asi bekiraiani,

‘Vereḡauka noribaia!’

Korana mabarari na beḡe ribaguni,
misina na beiaḡoni mo baregona.

¹² Ḡeri kira-sirivaḡi batuḡamaḡi-fitoḡarini,
ema ḡeri rakava mabarari asi ma
batuḡamaḡirini.’ ”

¹³ Barau na mai ginitaḡo maiḡa ekiraḡiani,
“ginitaḡo variḡuna” etoni nai tu, ḡia na mo gini-
taḡo tovotovonai moḡa tu guinena na ekiraḡiani.
Ma kara eguinenani e erakavani tu asikauna
berekwarekwani.

9

¹ Ginitaḡo guinena tu ma ḡena taravatu misimisiri toma-rakariḡo ḡana, ema ma ḡena gabu veaḡana maki. Mo gabu veaḡana tu tanobarai etanuni dagarana.

² Barau toma-rakariḡona ḡana farai rubuna ta ḡeragaiato. Mo farai rubuna nuḡanai daiḡutu giniguinena tu Veaḡa Gabuna ḡetato. Ġia nuḡanai tu lamefa torekauna dagarana, teibolo e Barau ḡeviniato berediri.

³ Kouḡau dabuḡana vaḡa-ruaruana murinai tu daiḡutu ta maia. Moḡa tu Veaḡa Lelevaḡi Gabuna ḡetato.

⁴ Ġia nuḡanai tu golo fatana, goḡu ma bonana iatanai beḡene vei ḡana, ema Kiraiḡitore Mauḡana; ġia murikana mabarana tu golo na ḡeveiato. Ma mauḡa nuḡanai tu golo ḡurona ta, nuḡana ma manana e Arona ḡena togoi, egarakauto dagarana, ema fore ruarua Barau na iatari ai taravatu etoreto foreri.

⁵ Mo mauḡa iatanai tu kerubi ruarua ḡevaḡa-ruḡa veḡoirarito. Mo kerubi tu ḡau garagarari, vetoḡari tu aneru kavari. Ta tavi ta dudu ai ḡevaḡa-ruḡaiato, ma ta maki tavi ta dudu ai, ma faneri ḡekeorito, benamo rakava voivaḡiri gabuna ḡegoru-tariato. Mo kerubi ruarua na tu Barau ḡena mareva baregona ḡekiraḡiani. Senaḡi maiḡeri dagara misikoseri mabarari tu toma asi baḡa kiraḡirini.

⁶ Dagara mabarari moḡesi ḡeveirito murinai, Rubu Veaḡa vereri ḡaro vanaḡivanaḡi daiḡutu giniguinena nuḡanai ḡeraka-toḡato-ḡoi, benamo ḡeri ḡauvei ḡeveirito-ḡoi.

⁷ Senaġi rubu verena baregona ġereġana moġo laġani ta nuġanai vaġa-sebona daiġutu vaġa-ruaruana nuġanai eraka-toġato-ġoi. Ġena raka-toġa ġarori mabarari ai tu rara maki eġabitaġoato-ġoi. Mo rara ġia na tu rakava tuġamaġi-fitoġari ġana ginitaġo dagarana evaġa-iaġoato-ġoi. Guine tu ġia ġena rakava ġana evinito-ġoi ema murinai tu tarimarima ġeri rakava ġana. Mo rakava tu asi ribari nai ġeveirito-ġoi rakavari.

⁸ Iauka Veaġa na maiġeri veiġa mabarari ġerina ġita tu maiġesina evaġa-guruġarani: Bema Barau toma-rakarigona ġana farai rubuna giniginena roġo eruġa-taġoni nai tu, Veaġa Lelevaġi Gabuna rakatoġa dabarana tu roġosi roġo bene vekeo.

⁹ Mo farai rubuna tu toma mai negai kara beġe ġorani evaġa-foforiani. Mai farai rubuna nuġanai varevare dagarari e ginitaġo dagarari vaġa-ilailana boromakau, mamoe, manu Barau ġeviniato-ġoi dagarari mabarari na ġetomarakarigoto-ġoi tarimari nuġari asi ilaila beġe iarevarini.

¹⁰ Korana mo Barau ġeviniato-ġoi dagarari tu ġaniġani e niuniu dagarari, ema tarima beġene iareva ġana veġuriġi maġuriri irauirau. Mai tu mabarari tauġani taravaturi moġo. Barau na tarimarima evinirito beġene korana-iaġiri, bene iaġo mo, ġaro ta, dabara variġuna bevaġa-ruġaiani.

Iesu rarana

¹¹ Senaġi Keriso tu dagara namori ġema-foforito ġeri Rubu Veaġa verena baregona. Ġia tu farai rubuna barana e namo vedaureana nuġana na eraka-toġato. Dia tarimarima na ġeragaiato farai

rubuna, korana mo farai rubuna tu dia mai tanobara dagarana.

¹² Keriso tu dia nanigosi o boromakau naturi rarari seḡukari ai mo rubu ai eraka-toḡato. Senaḡi ḡia tu ḡia rarana seḡukanai Veaḡa Lelevaḡi Gabuna nuḡanai vaḡa-sebona moḡo eraka-toḡato. Benamo ḡita eḡabivaḡi-moḡovaḡirato rakava ḡena seḡuka na.

¹³ Nanigosi ma boromakau rarari ema boromakau natuna variḡuna ḡegabuato kauna, Rubu Veaḡa vereri na vei-rakavai ḡemiroto-ḡoi tarimari iatari ai misimisiri ḡefiu-kaurito-ḡoi. Moḡesina ḡeveirito-ḡoi tu tarimarima tauḡaniri ḡevaḡa-veaḡarito-ḡoi Barau ḡoiranai.

¹⁴ Senaḡi Keriso rarana na moḡeri evanaḡirito. Korana ḡita nuḡara, mase ḡevaḡa-ḡoraiani ḡauveiri ḡerina, eiarevarato, maḡuri Barauna ḡena vetuḡunaḡi bitana iaḡo-vini ḡana. Keriso tu asi vetoukauna ta, tauḡena tanu-vanaḡivanaḡi Iaukana ḡenana evevinito Barau ḡenai.

¹⁵ Ginitaḡo variḡuna nuḡanai Keriso tu Barau e tarimarima fakari ai eruḡani. Korana tu Barau na ekearito tarimari mabarari na ekiraḡi-toreato maḡuri vanaḡivanaḡina beḡene ḡabia. Moḡesi nai Keriso emaseto, tovotovona ginitaḡona nuḡanai tarimarima ḡevei-rakavato ḡeri rakava na bene ruḡa-vaḡiri ḡana.

¹⁶ Tarima ta roḡosi bene mase nuḡanai, beurani bene guruḡa-fofori, bemaseni nai tu, natuna na ḡena farefare bene ḡabiri. Mo ura o guruḡa-fofori tu fefai betoreani ḡia ḡena kiraḡitore guruḡana. Natuna na mo farefare asi roḡo beḡabirini bene

iaġo mo, tamana ġena mase tarimarima ġoirari ai bevaġa-moġoniani vau.

17 Korana tu mo ura ġetoreani fefana tu eguruġa-foforini tarimana bemaseni vau ma ġena seġuka, a bema ġia roġo maġuri tu, mo ura ġetoreani fefana tu asi seġukana.

18 Moġesina nai ginitaġo giniguinena maki rarana vau evaġa-seġukaiato-ġoi.

19 Korana Mose na taravatu guruġari mabarari tarimarima ġeri evarifiu-ġosiato-ġoi murinai, boromakau naturi variguri e nanigosi rarari eġabirito-ġoi, benamo nanu ġesi egiro-sebonarito-ġoi. Moġa murinai isopo legana vulu kakakakana na ġebaruato dagarana mo rara ma nanunai efereiato-ġoi. Benamo Mose na mo isopo legana ma vulunai rara tu taravatu bukana e tarimarima iatari ai efiu-kaurito-ġoi.

20 Mose ekirato, “Mai rara tu ginitaġo vaġa-moġonina dagarana Barau na ekiramito boġono korana-iaġia.”

21 Farai rubuna ema mo rubu nuġanai tomarakiġo ai ġeġauvei-iaġirito-ġoi farefareri mabarari iatari ai veiġa sebona eveiato-ġoi. Iatari ai rara misimisiri efiufiukauto-ġoi.

22 Moġoni, taravatu ekirani ilailanai, dori dagarara mabarari tu rara na beġe iarevani. Korana rara asi beriġoni nai tu, vei-rakava tuġamaġi-fitogari maki asiġina.

23 Senaġina maiġeri mai tu guba dagarari iouiouri moġo maiġesi ġeiarevarini. A gubai korikoriri ġetanuni dagarari iareva-iarevari ġana ginitaġo varevarena tu namona lelevaġi. Maiġeri

ginitaḡo varevareri evanaḡirini.

²⁴ Korana Keriso tu dia tarimarima na ḡeveiato veaḡa lelevaḡi daiḡutuna nuḡanai eraka-toḡato. Iesu tu guba korikorinai eraka-toḡato. Ma mait-oma tu ḡita urarai Barau ḡoiranai efoforini. Mo tarima na ḡeveiato moḡa tu gubai veaḡa lelevaḡi daiḡutuna moḡo ḡevaḡa-ilailaiato.

²⁵ Rubu Veaḡa verena baregona tu laḡani tata nuḡari ai Veaḡa Lelevaḡi Gabunai rara eḡabi-toḡato-ḡoi. Keriso moḡesina tu asi eveini. Ġia tu dia gubai eraka-toḡato murinai vau vanaḡivanaḡi tauḡena ginitaḡo varevarenai eiaḡoni, benamo Barau ḡenai evevinini.

²⁶ Moḡesina tu tanobara evesinato na veḡata bene midigumidigu. Senaḡi mai tanobara mag-ona eḡabi-iaḡoani, mainai vau vaḡa-sebona moḡo ema foforito. Mo tu ginitaḡo varevarenai eve-vaḡa-iaḡoto rakava bene ḡabi-veḡitari ḡana.

²⁷ Evetoreto, tarimarima mabarari tu vaḡa-sebona moḡo beḡe maseni, ma murinai tu Barau na bevaḡa-kotarini.

²⁸ Keriso kavana vaḡa-sebona moḡo ginitaḡo dagarana eiaḡoto, tarimarima mabarari ḡeri rakava bene ḡabi-veḡitari ḡana. Senaḡi ġia tu ma bema-fofori ḡenoḡoini. Mo tu dia rakava ma benema ḡabi-vaḡiri ḡana, senaḡina deikara ġia ḡenari-taḡoani tarimari vaḡa-maḡuriri ḡana.

10

Ginitaḡo guinena na rakava asi beḡabi-veḡitarini

¹ Mose ġena taravatu tu dagara namori vau beġe ġorani iouiouri moġo, dia dagara tauri korikori. Ġia na mo ginitaġo dagarari laġani laġani ġevinito-ġoi, senaġina mo ginitaġo dagarari na toma-rakariga ġeiaġoto-ġoi tarimari asi evaġa-namo vedaurearito.

² Bema mo ginitaġo dagarari na ġetoma rakariġoto-ġoi tarimari beġere vaġa-namo vedaureari nai tu, asi ma beġere ginitaġo-ġenoġoi. Korana ġia tu ġere iareva-moġovaġi, ema ma ġeri vei-rakava guineri mamiraġiri asi ma ġere ġabi-ġenoġoiri.

³ Senaġi mo ginitaġo veiġari laġani tatai ġeveirito-ġoi veiġari na tu mo laġani tata nuġari ai ġevei-rakavato-ġoi, moġeri ġekira-vararito-ġoi.

⁴ Korana tu boromakau e nanigosi rarari na rakava tu asi ilaila beġabi-veġitarini.

⁵ Moġa lorinai Keriso tanobara ġana eiaġomato nai tu ekirato,

“Ġoi tu ginitaġo dagarari vaġa-ilailana boromakau, mamoe, nanigosi ema varevare dagarari asi ourani, senaġi tauġani ta ovei-toreato au ġegu.

⁶ Karava na boromakau, mamoe, nanigosi eġararini, ema vei-rakava bono ġabi-vaġiri ġana ginitaġo varevareri ġeveini ġeri ai maki asi oiakuni.

⁷ Moġesi naima au akirato,

‘Barau o, au tu iniġegu,

Buka Veaġai tu au ġekiraġiguto, au baiaġoma tu ġoi ġemu ura bana veia ġana.’ ”

⁸ Keriso ġena guruġa giniguinena tu maiġa, “Ġoi tu ginitaġo dagarari e varevare dagarari asi

ourani. Karavai ġegaburini varevareri e veirakava bono ġabi-vaġiri ġana ginitaġo varevareri ġeveini maki asi oura-vinirini, ema ġeri ai asi oiakuni.” Maġeri veiġa tu taravatu na ekiraġirini ilailanai, senaġi ġoi na tu asi oiaku-iaġirini.

⁹ Moġesi nai ma ekirato, “Barau o, au tu iniġegu, au baiaġoma tu ġoi ġemu ura veiġana bana veia ġana.” Benamo ginitaġo veiġana giniguinena etore-veġitaiato, benamo moġa gabunai tu ta ma evaġa-ruġaiato.

¹⁰ Benamo Barau ġena ura lorinai, Iesu Keriso tauġanina ginitaġo dagananai evaġa-iaġoato vaġa-sebona moġo. Benamo monana ġita evaġa-veaġarato.

¹¹ Rubu Veaġa vereri mabarari ġaro vanaġivanaġi tata ġeruġa-tarito-ġoi, benamo mo ginitaġo ġauveiri ġeveirito-ġoi. Senaġi ġeri ginitaġo dagarari tu dagara sebori moġo ġevinito-ġoi vanaġivanaġi. Ema mo ginitaġo dagarari na rakava tu asi ġeġabi-veġitarito-ġoi.

¹² Senaġi Keriso na rakava ġabivaġiri ġana tu ginitaġo sebona moġo eveiato ġaro mabarari ġana. Benamo moġa murinai Barau ġimana aroribanai ea tanu-tarito.

¹³ Mo negai beiaġoma maitoma tu evenarini, beiaġoni mo, ġia ġevetari-viniani tarimari mabarari Barau na ġia kwakuna fanakauna dagananai betore-taririni.

¹⁴ Korana ginitaġo dagarana sebona na moġo evaġa-veaġarito tarimari evaġa-namo vedaurearito. Ma ġia tu namo vedaurea beġe tanuni, vanaġivanaġi.

15 Iauka Veāga na maki evaāga-ribarani. Guine tu ekirato,

16 “Vereāgauka ekirani,

‘Moāgeri āgaro muriri ai,

au āgia āgeri tu mai ginitaāgo baveiani.

Au āgegu taravatu āgia nuāgari ai batore-toāgarini,

ema āgia debari ai baberarini.’ ”

17 Ema ma ekirato,

“Āgia āgeri vei-rakava e veiāga āgeāveāgeāvevari asi ma batuāgamaāgi-āgenoaāgerini.”

18 Maiāgeri etuāgamaāgi-fitoāgarito nai tu, rakava āgabi-veāgitari āgana varevare dagarana ta tu asiāgina maia.

Barau sevina āgana siraka-kavi ma tuāgamaāgi kokorera āgesi

19 Moāga lorinai, tarikakagu, āgita tu nuāgara gwaāgiāgi Iesu rarana āgenana Veāga Lelevaāgi Gabunai bita raka-toāgani.

20 Mo vekouāgau dabuāgana o ketin evedare-kikimato, monana Keriso na āgita āgera maāguri dabarana variāgana ekeo-fakaiato. Mo vekouāgau dabuāgana tu Keriso tauāganina.

21 Āgita tu ma āgera Rubu Veāga verena baregona, Barau āgena numa eāgita-taāgoani.

22 Āgita nuāgara tu eiarevarito rakava mamiraāgiri āgerina, ema tauāganira maki nanu namo vedau-reana na eāguriāgiriti. Moāgesi naima Barau āgenai siraka-kavinaāgi nuāgara ma moāgoniri āgesi e ma āgera veāgabadama korikoriri āgesi.

23 Āgera tuāgamaāgikau tavaāga-moāgoniani dagarana āgenai tana veāgabi-gigitari, asi tana

ġareva-ġareva. Korana Barau na kara ekiraġi-toreato tu beveiani.

²⁴ Ema karora bitana tuġamaġiri kamasi tata bita vaġa-kavarini, benamo beġe veura-vinini, ema ġauvei namori beġe veini.

²⁵ Ġita ġera raka-vegogo ai bitana fofori-ġoi, asi bitana tanu, tari ġeveini kavana. Senaġi karora ġesi velaunaġi bitana vaġa-baregoa. Korana tu tauġemi na varau ġoġitaiani, Keriso ġena iaġoma ġarona tu mai ekavinaġi-rakavani.

²⁶ Bema guruġa moġonina taribaiani murinai, ma taġiġiraġeni, benamo tavei-rakavani nai tu, bitana riba, rakava ġabi-veġitari ġana, ginitaġo dagarana ta tu asiġina maia.

²⁷ Senaġi ma garira ġesi kara ġoirai ġerai beġorani, moġa moġo bitana nari-taġoa. Mo tu Barau ġena Kota Baregona, ema Barau ġevetari-viniani tarimari e iaukari beġararini karavana.

²⁸ Tarima ta na Mose ġena taravatu asi ekorana-iaġiato-ġoi, benamo ġeġita-kauato-ġoi tarimari ruarua o toitoi na ġekiraġi-foforiato-ġoi. Mo tarima tu ġevaġi-maseato-ġoi, asi ġevetuġa-ġwaiato-ġoi.

²⁹ Ġomi ġotuġamaġini, Barau Natuna deikara na kwakuna fanakauna daganai evaġa-iaġoani tarimana tu kamasi? Mai tarima tu rakava voina baregona beġabiani. Ġia na tu mo ginitaġo rarana, ġia evaġa-veaġaiato dagarana, asi veaġa raranai evaġa-iaġoani. Ema varevare-bara Iaukana ġenai maki veġa rakava kwaikwaina eveiani.

³⁰ Korana ġita ma ribara Barau ekirato, “Rakava voina tu au na bavaġa-voiani, au na

bavini-ġenoġoiani.” Ema ma ekirato, “Vereġauka na ġena tarimarima beġita-viriġirini.”

³¹ Maġuri Barauna ġimanai boketo-raġeni tu garina maki asikeikeina.

³² Ġaro guineri ġotuġamaġi-ġenoġoiri. Barau ġena mama ġoġabiato murinai, midigumidigu barego ġodoġarito, senaġi ġoruġa-gigitarito.

³³ Negatari ai tu ġutuma bara ġoirari ai ġevaġa-maiakamito-ġoi, ma ġevaġa-midigu midigumito-ġoi. Ema negatari ai tu ġomi kavana ġevaġa-midigu midigurito-ġoi tarimari seviri ai ġoruġa-tarito-ġoi, ġoruġa-duku dukurito-ġoi.

³⁴ Ġediburarito tarimari ġesi ġomidigumidigu sebonato-ġoi, ema ġemi farefare ġeverarimito-ġoi maki ġoiaku-iaġirito-ġoi moġo. Korana ma ribami, ġomi tu ma ġemi farefare namori, beġe tanu-vanaġi vanaġini dagarari.

³⁵ Moġa lorinai ġemi tuġamaġi kokore maniġa asi boġono fitoġari. Korana maniġa voina tu barego lelevaġina boġoa ġabiani.

³⁶ Boġono vevaġa-gwaġiġi, korana Barau ġena ura veiġana boġo vaġa-koriani murinai tu, kara ekiraġi-toreato mabarana boġo ġabiani.

³⁷ Korana Buka Veaġa ekirani,
 “Nega tu misina moġo,
 ma beiaġomani etoni tarimana tu beiaġomani, asi bekwaiboni.

³⁸ Au ġegu vei-iobukaiobuka tarimana tu ġena veġabidadama lorinai bemaġurini.

Senaġi murina ġana ma beraka-ġenoġoini nai,
 au tu asi baiakuni ġia ġenai.”

³⁹ Senaḡi ḡita tu murira ḡana asi ma bita raka-ḡenoḡoini, benamo bita rekwarekwani. Asigina, ḡita tu ma ḡera veḡabidadama, be maḡuri bita ḡabiani.

11

Veḡabidadama tarimari

¹ Veḡabidadama anina tu mai-ḡesi. Tatuḡamaḡi-dadamaḡirini dagarari tavaḡa-moḡoni korikoririni. Matarai roḡosi bitana ḡitari, senaḡina tavaḡa-moḡoni korikoririni, moḡeri dagara tu moḡoni ema bita ḡabirini.

² Sene tarimari tu ḡeri veḡabidadama lorinai, Barau na eḡabi-raḡerito.

³ Taveḡabidadamani lorinai taribani, Barau eguruḡato, benamo guba e tanobara evetoreto. Moḡa lorinai mai taḡitarini dagarari tu Barau na asi taḡitarini dagarari ḡerina eveirito.

⁴ Abela tu ma ḡena veḡabidadama Barau ḡenai lorinai, Barau eviniato varevare dagarana na Kaino ḡena varevare dagarana evanaḡiato. E ma ḡena veḡabidadama lorinai, Barau na ḡena varevare dagarana ekiraḡiato varevare namona ema Barau na evaḡa-moḡoniato ḡia tu vei-iobukaiobuka tarimana. Ma Abela tu varau emaseto, senaḡina ḡena veḡabidadama lorinai roḡo eguruḡani.

Abela, Enoka, Noa

⁵ Enoka ma ḡena veḡabidadama lorinai, Barau na eḡabi-varaḡeato moḡo, asi emaseto. Ma tarimarima na maki asi ḡedoḡariato, korana Barau na eḡabi-vaḡiato. Roḡosi bene ḡabi-veḡitaia

nuḡanai, Barau ḡena bukai ekirani, Enoka na Barau iauna evaḡa-iakuato.

⁶ Asi ḡena veḡabidadama tarimana na Barau tu asiḡina ḡinavaḡi bevaḡa-iakuani. Korana deikara Barau ḡenai eiaḡomani tarimana tu bene vaḡa-moḡoni Barau tu maḡuri etanuni. Ema Barau ḡevetauani tarimari mabarari tu voiri namori Barau na bevinirini.

⁷ Noa ma ḡena veḡabidadama lorinai, Barau na ḡoirai beḡe ḡorani dagarari ekira-toreḡauato. Mo tu Noa na roḡosi bene ḡitari dagarari. Noa na Barau evaḡa-moḡoniato, benamo ma garina ḡesi bouti ta eragaiato, ḡaraḡona e natuna bene vaḡa-maḡuriri ḡana. Ġia ḡena veḡabidadama na tano-bara tarimari ekiraḡi-foforirini rakava tarimari. Ma ḡia tu ḡena veḡabidadama lorinai Barau na ekiraiato vei-iobukaiobuka tarimana. Mai vei-iobukaiobuka tu veḡabidadama ḡenana eiaḡomani dagarana.

Aberahamo

⁸ Aberahamo ma ḡena veḡabidadama lorinai, Barau na ekeaiato nai eseḡaḡiato. Barau na ekeaiato tu ḡena vanuḡa bene raga-kwanea, ma Barau na tanobara ta ma beviniani, mo ḡana bene iaḡo. Benamo Aberahamo eraka-rosito moḡo, asi ribana aiḡana eiaḡoni senaḡi eiaḡoto moḡo.

⁹ Ma ḡena veḡabidadama lorinai, Barau na eki-raḡi-toreato tanobaranai ea vanuḡato. Ma monai tu noḡa moḡo tanukau tarimana ta tanobara borunai etanuni kavana. Isako e Iakobo kavana farai numari ai ḡetanuto-ḡoi. Maiḡeri tarima toitoi tu Barau ḡena kiraḡitore ḡeḡabiato.

10 Korana Aberahamo tu vanuġa baregona evaġa-nogaiato-ġoi. Mo vanuġa tu fore baregona iatanai beruġakauni. Mo vanuġa tu Barau tauġena na beboioġaiiani e beragaiani.

11 Veġabidadama lorinai Sara na kokore eġabiato bene ġabi ġana, ema eġauka-rakavato, senaġi mero keina evaġa-maġuriato. Ġia ma ribana, Barau na kara ekiraġi-toreato dagarana tu beġorani.

12 Benamo mai tarima sebona eġauka-rakavato, senaġi ġia ġenana senena ġemaġurito tu guba visiġuri kavana vovoka tabutabu, ema kone mirina kavana asi iavi-iavina.

13 Maġeri tarimarima mabarari tu veġabidadamai ġetanuto-ġoi nuġanai ġemaseto. Barau na ekiraġi-torerito dagarari ġia na tu asi ġeġabito, senaġi manaġai moġo ġeġita-guinerito, benamo ġeġabi-raġerito. Ema ġeguruġa-foforito ġia tu tanobara boruna tarimari. Ġia mai tanobarai tu ġetanukauni moġo.

14 Moġesina ġeguruġani tarimari tu ġeri guruġa na ġevaġa-foforirini, ġia tu ġeri tanobara korikorina ġevetauani.

15 Bema ġeraga-kwaneato tanobarana ġere tuġamaġi-ġenoġoia nai tu, ma dabara ġere ġenoġoi.

16 Senaġi ġia tu tanobara namo vedaureana ġeuravini-rakavaiato-ġoi. Mo tu gubai etanuni dagarana. Moġa lorinai Barau tu asi emaiakaiani, ġia ġeri Barau ġetoni nai, korana Barau na ġeri vanuġa baregona ta eraga-toreato.

17 Aberahamo tu ma ġena veġabidadama.

Moĝesina nai Barau na etovonaĝiato nai tu, natuna Isako ginitaĝo dagaranaĭ evaĝa-iaĝoato, benamo Barau ma evarevare-viniato. Aberahamo ribana, Barau na kiraĝitore tu ĝia eviniato, senaĝina ĝia natuna sebona kwariĝutu moĝo tu ginitaĝo dagarana ĝana bene vaĝia etato.

¹⁸ Barau na Aberahamo maki maiĝesina eki-raiato, ekirato, “Isako ĝenana moĝo ĝoi senemu beĝe maĝurini.”

¹⁹ Aberahamo etuĝamaĝito tu Barau na Isako ma bevaĝa-maĝuri ĝenoĝoiani riba. Moĝesina naima iniĝesina ma sikiraĝia: Aberahamo na Isako mase na eĝabi-ĝenoĝoiato.

Isako, Iakobo, Iosefa

²⁰ Isako ma ĝena veĝabidadama lorinai, Iakobo e Esau evaĝa-namorito, ema ĝeri ai vau beĝea ĝorani dagarari ekiraĝirito.

²¹ Iakobo ma ĝena veĝabidadama lorinai, dori emaseto-ĝoi nuĝanai tu Iosefa natuna ruarua evaĝa-namorito, ema ĝena togoi ĝenai eveĝabiritoĝoto, benamo Barau etoma-rakariĝo viniato.

²² Iosefa ma ĝena veĝabidadama lorinai, eĝauka-dorudoruto, dori emaseto-ĝoi nuĝanai tu, Isaraela tarimari Aigupito na beĝe raka-vaĝini ekiraĝiato, ema turiĝana kamasi beĝene veia guruĝana evinirito.

Mose

²³ Mose tamana e sinana Barau ĝenai tu ma ĝeri veĝabidadama. Moĝa lorinai Mose emaĝurito ĝaronai ĝeĝitaiato mero keina namona korikori, benamo kini ĝena guruĝa garina tu asi ĝeveito.

Senāgi tamana e sinana na ġeġabiato, benamo numa nuġanai ġue toitoi ġetore-gumuato.

²⁴ Mose ma ġena veġabidadama lorinai, ebaregoto nai tu asi eurato beġene kira, ġia tu Pharao natuna ġuiatona natuna merona.

²⁵ Ġia tauġena eurato, Barau ġena tarimarima ġesi beġene vaġa-midigumidigu sebonaia. Ma asi eurato, vei-rakava nuġanai asi beġe tanu-maukani verereri ai bene tanu-namo.

²⁶ Ġia na etuġamaġiatio tu, Keriso uranai beġe vaġa-maiakaiani voina tu barego lelevaġi, Aigupito ai farefare voiri bevanaġirini. Korana ġia tu eboġequine-iaġoto, ġoirai voina eġita-iaġoato.

²⁷ Mose ma ġena veġabidadama lorinai, Aigupito na eraka-veġitato, Aigupito verena bebaruni garina asi egarito. Ġia tu ekokoreto, korana tu asi taġitaiani Barauna ġia na tu matana na noġa moġo eġitaiato.

²⁸ Ma ġena veġabidadama lorinai, Rubu Veaġa verekona ekorana-iaġiatio ema Isaraela tarimari ekirarito, rara ġeri ġatama-boka koberi murikari ai beġene dau. Benamo mase aneruna na naturi, ġemaġuri-quineto merori, asi bene vaġiri.

Isaraela tarimari na Barau ġeġabidadama-viniato

²⁹ Isaraela tarimari na Barau ġeġabidadama-viniato lorinai, Davara Kakakakana nuġana na tanobara kaukauna na noġa moġo ġerakavanaġito. Ma Aigupito tarimari maki ġevanaġi ġetato nai tu, davara na eġutu-ġaurito.

30 Isaraela tarimari ma ġeri veġabidadama lorinai, Ieriko vanuġa maġuna ġaro vaġa-imaima ru-
arua (7) ġeraka-ġeġeraġiato murinai eketoto.

31 Mata-boraġa ġuiatona Rahaba Barau ġenai
eveġabidadamato lorinai, Isaraela ġeri mara-
mara tarimari eġabi-raġerito, benamo Barau
ġeseġafore-viniato-ġoi tarimari ġesi asi ġevaġi-
sebonaiato.

32 Ma kara ma bakiraġiani? Asi ġegu taimi
Gideona, Barak, Samson, Iefeta, Davida, Samuela
ema peroveta tarimari variri bakiraġirini.

33 Ġia tu ma ġeri veġabidadama lorinai, tano-
bara basileiari ġevetari-vinirito nai, ġekokoreto-
ġoi. Veġa iobukaiobukari ġeveito-ġoi, ema ki-
raġitore dagarari ġeġabirito laion bokari ġekou-
ġaurito.

34 Karava seġuka rakava ema-moreni ġevei-
buserito, ema vetari baġari matari na ġeraga-
maġurito. Ġeri moiramaira nuġari ai ġekokoreto;
vetari ai tu guruġari maki seġuka rakava, ema
ġevetari-vinirito-ġoi doġorori ġevaġa-ketorito-ġoi.

35 Ġemaseto-ġoi tarimari ma ġevaġa-maġuri
ġenoġoirito-ġoi, benamo sinari na ma ġeġabi-
ġenoġoirito-ġoi. Ma tari tu dibura numai
tauġaniri ġekwari-rakava kwaikwairito-ġoi ma
dori ġemaseto-ġoi, senaġi asi ġeurato-ġoi Barau
beġene kira-ġuniġaua, benamo dibura numana
na beġene ruġa-vaġiri. Korana ġeri ura tu vaġa-
variġisi ġenoġoi namona beġene ġabia.

36 Ma tari tu ġevaseva-vaseva iaġirito-ġoi,
ġekwaririto-ġoi, ma tari tu seini na ġebarurito-ġoi,
benamo dibura numanai ġetorerito-ġoi.

37 Fore na ġetakirito-ġoi; ma tari tu ġeso-
 ġuturito-ġoi; ma tari tu vetari baġari na
 ġevaġirito-ġoi. Mamoe kefiri e nanigosi kefiri
 ġevei-rakaoto-ġoi, asi ġeri-ġari, ġevaġa-
 midigurito-ġoi, ema tarimarima na veġa
 asi namori ġeri ai ġevei-vinirito-ġoi.

38 Tanobara ġia ġeri ai tu asi namo moġo.
 Tanobara fakari na e ġoro tuġuri na, tano
 kouġari na, ema guri na ġetanu-rakaoto-
 ġoi.

39 Maiġeri tarimarima mabarari ġeri
 veġabidadama loriri ai, Barau na evaġa-
 maġuririto. Senaġina ta na Barau na
 ekiraġi-toreato dagarana ta tu asi eġabiato.

40 Korana Barau na dabara namona ta
 ġita ġera eboioġaiato. Ġia ġena ura ġia
 maki ġita ġesi vaġa-sebo vau bene
 vaġa-namo vedaureara.

12

1 Mo veġabidadama tarimari, ġita
 ġeġita-taġorani tarimari, tu ġutuma
 lelevaġi, magube na noġa moġo beġe
 ġeġeraġira. Moġa lorinai ġita ġekoukou-
 ġaurani dagarari, ema vei-rakava ġita
 ġebarubaru-tarirani dagarari mabarari
 sifitoġari. Benamo ma kokorera ġesi
 ġoirarai Barau na etoreato raga-
 iruirunai siraga.

2 Matara Iesu ġenai sitore-kauri. Korana
 Iesu na ġita ġera veġabidadama
 esinaiato, ema bevaġa-ġuġuruani.
 Ġia na ġoiranai mo iaku e verere
 etuġamaġiato nai, satauro maiakana
 asi etuġamaġiato. Benamo Barau ġena
 terona arorib-anai etanu-tarito.

3 Iesu situġamaġia. Ġia tu vei-rakava
 tarimari na asi ġeġabi-raġeato, ġeseġa-
 fore-viniato,

senāgina ekokoreto. Moġa lorinai asi boġono tuġamaġi-moira, e asi boġono ruġa-ġuirāġi.

⁴ Ġomi tu rakava ġesi ġovevaġi-tanuni. Senāgina ġomi mani vevaġi nuġanai tu, ta raramu roġosi roġo bere riġo.

⁵ Ema ġomi tu Barau na ekeamito ġia natuna, senāġi mai velaunaġi guruġana tu ġotuġarekwaiato, ekirato,

“Natugu, Vereġauka na vevaġa-riba veiġari gwaġiġiri evinimuni nai,

asi bono ġabi-meraġari,
ema bekira-feimuni nai,
nuġamu asi bono vaġa-moiraia.

⁶ Korana Vereġauka na eura-vinirini tarimari tu vevaġa-riba gwaġiġiri evinirini, ema ġia natunai evaġa-iaġorini tarimari mabarari tu ekwaririni.”

⁷ Moġa lorinai matakani veiġari ġemi ai beġe ġorani nai tu boġono kokore. Korana ġomi tu Barau natuna naima moġesina eveimini. Ma siġitaia, kamara mero keina tu tamana na asi evaġa-matakaniani?

⁸ Tama mabarari na naturi ġevaġa-matakanirini. Ma bema ġomi Barau na asi evaġa-matakanimini, moġa anina ġomi tu dia Barau natuna korikori, ġomi tu gara meromi.

⁹ Vaġa-ilailana tauġani rekenai ġita tamara korikoriri na ġevaġa-matakanirani, benamo moġeri korari ai tamara tagubakaurini. Moġesina kavana namona tu ġita tata iaukara Tamari Barau maki tana gubakaua, benamo bitana maġuri.

¹⁰ Ġita tamara na tu ġaro kotunai moġo ġevaġa-matakanirani. Mo tu ġia tauġeri na ġetuġamaġiani

namo ġetoni ġarori ai moġo. Senaġi Barau na evaġa-matakanirani tu ġita ġera namo ġana, ema ġia ġesi bitana veaġa-vegogo ġana.

¹¹ Maitoma matakani veġari ġeiaġomani tu ma midigumidiguri, asi iakuri. Senaġina murinai vau mo matakani veġari ġerina beribani tari-mana tu vei-iobukaiobuka ema maino tarimanai beiaġoni.

Nuġara bitana vaġa-kokoreri ema bitana ruġa-gigitari

¹² Moġa lorinai ġimami beġe ġeroġero-riġo, ġoġabi-vaisiri, ema tuimi beġe moira ġeġoġo-ġoġorini, ġovaġa-kokoreri.

¹³ Benamo kwakumi na ġoraka-iaġirini fanari ġovei-roroġotori, be kwaku rakava tarimana kwakuna asi bene rakava-lelevaġi, senaġi bene namo.

¹⁴ Boġono kokore-korikori, tarimarima mabarari ġesi maino ai boġono tanu uranai. Be ġemi maġuri beġene veaġa e asi vetoukaunai beġene iaġo bene. Korana tu ma vetoukauna e asi veaġa tarimana na Vereġauka tu asi beġitaiani.

¹⁵ Boġono venari, be tarima ta Barau ġena varevare-bara ġenana asi bene raka-veġita, ma nuġa-ġirima ġokana nuġanai asi bene tubu-raġe. Korana nuġa-ġirima ġokana betubuni, ġokana mamakina na ġomi fakami ai rakava bevaġa-ġoraiani, benamo tarimarima vovoka bevaġa-rakavarini Barau ġoiranai.

¹⁶ Boġono ġitaia, ta ġomi fakami ai mata-boraġa veġari asi bene veiri, ema Esau na Barau asi ekorana-iaġiato kavana asi bene vei. Esau na tu

ġena maġuri guine seġukana ġaniġani diġu sebona moġo uranai evare-fitogaiato.

17 Moġa murinai ġomi ma ribami, mo maġuri guine vevaġa-namona tamana ġenana neġabia etato tu tamana na asi eġabi-raġeato. Moġoni, tamana ma taġina ġesi enoġiato, senaġi tamana asi ma etuġamaġi-ġenoġoito.

18 Ġomi tu dia ġimami na boġo ġabi-karaiani ġorona ġana boġo iaġoma, Isaraela tarimari kavana. Ġia tu Sinai Ġorona sevina korikorinai ġeruġato, benamo karava emoreto ġeġitaato, ema mukuna dubara kiukiuna e iavara barego lelevaġina;

19 ema kibi guruna asikeikeina eraġeto e garo baregona eguruġato ġeseġaġirito. Isaraela tarimari na mo garo ġeseġaġiato nai tu, Mose ġenoġiato mo garo na asi ma bene vaġa-guruġari.

20 Korana Barau na taravatu guruġari evinirito nai tu, ġegari-rakavato, Barau tu ekirato, “Bema tarima ta na o boromakau ta o nanigosi ta na mo ġoro bea vei-karaiani nai tu, fore na boġono takimasea.”

21 Moġeri vetoġa ġefoforito gariri tu asikeikeiri, benamo Mose ekirato, “Au tu eġoġo-ġoġoguni, agari-rakava rakavani.”

22 Senaġina ġomi tu Siona Ġorona ġana boġo iaġoma e guba Ierusalemna maġuri Barauna ġena vanuġa baregona ġana, ema aneru ġutuma gorogoro asi iavi-iaviri ġeri ai boġo iaġoma.

23 Ġomi tu vegogo baregona ġena e Barau natuna ġemaġuri-guineto ekalesiari ġeri ai boġo iaġoma. Ġia arari tu Barau na gubai etorerito.

Ema ġomi tu tarimarima mabarari Kotai beġita-viriġirini Barauna ġenai e vei-iobukaiobuka tari-mari iaukari, Barau na evaġa-namo vedaurearito iaukari, ġeri ai boġo iaġoma.

²⁴ Ema Iesu ġenai boġo iaġoma. Iesu gini-taġo variġunai tu Barau e tarimarima fakari ai eruġani. Ema ġia rarana ġenai boġo iaġoma. Iesu rarana tu ġomi ġemi ai eketokauto. Ma Iesu rarana na ekiraġiani guruġana seġukana na Abela rarana ġena guruġa seġukana evanaġiani.

²⁵ Boġono venari, Barau na evaġa-guruġamini nai, garona asi boġono kira-sirivaġi-vinia. Korana tanobarai Barau na ekira-toreġaurito tarimari ġekira-sirivaġito nai tu, asi ġeraga-maġurito. Ġeri kira-sirivaġi voina ġeġabiato. Ġita tu kamasi bita raga-maġurini? Barau toma tu gubai etanuni, benamo monana ġita ekira-toreġaurani. Bema ġia ġenana bita raka-veġitani nai tu, kamasi bita raga-maġurini.

²⁶ Moġeri ġaro ai Barau garona na tanobara eruku-iagaiaagaiato. Senaġina toma Barau tu eguruġa-toreto, ekirani, “Au na tanobara vaġa-sebona maia barukuani. Dia tanobara ġereġana moġo barukuani, senaġina guba maki barukuani.”

²⁷ Mai guruġa “vaġa-sebona maia” anina tu, guinenai Barau na eveirito dagarari beġe iagaia-gani nai tu bekoki-veġitarini. Korana tu asi beġe iagaia-gani dagarari moġo beġene tanu ġana.

²⁸ Ġita na taġabiani basileiana tu asi beġareva-ġarevani. Moġa lorinai Barau sitanikiu-vinia, ema Barau na eura-viniani maġurinai sitoma-rakariġo vinia ma vegubakaura e ma garira ġesi.

29 Korana ġita ġera Barau tu karava ġaraġara.

13

Barau vaġa-iakuna veiġari

¹ Ġomi fakami ai tarikaka veuravinina bene tanu-vanaġi vanaġi.

² Tarima boruri ġabiraġeri asi boġono tuġa-rekwaia, korana tarima tari maniġesi ġeveito-ġoi nai tu, aneru ġeġabi-raġerito. Senaġi ġia tu asi ġeriba-maoroto mo tu aneru ġeġabi-raġerini.

³ Dibura numanai ġetanuni tarimari boġono tuġamaġiri. Boġono tuġamaġi, ġomi maki ġia ġesi dibura numanai ġoro tanu-vegogo. Ema ġevaġa-midigu midigurini tarimari boġono tuġamaġiri. Boġono tuġamaġi ġomi maki ġere vaġa-midigu midigumi.

⁴ Tarimarima mabarari na veġaraġo beġene gubakaua, ema veġaraġo tarimari ġeri gena-gena gabuna bene namo-vedaurea. Korana ma ġaraġona, senaġina ekima-rakaoni, o ma eveġaraġo-sirivaġini tarimana, ema mata-boraġa veiġari ġeveini tarimari mabarari tu Barau na ġeri rakava voiri bevinirini.

⁵ Moni asi boġono uravini-lelevaġiri. Kara dagara ġemi ai maniġeri boġono ġabi-raġeri ma iakumi ġesi. Boġono kira, mai dagara ġemai maġeri tu ġemai ilaila. Korana Barau tu ekirato, “Au na asiġina ġinavaġi baraga-kwanemini, ema ġereġami asiġina ġinavaġi baiaġuimini.”

⁶ Moġa lorinai nuġara ma kokoreri ġesi bitana kira,

“Vereġauka na au bevaġa-kavaguni,

be au asi bagarini.

Tarimarima na tu kara beḡe veiani au ḡegu ai?”

7 Ġotuḡamaḡi-ḡenoḡoi, ḡeguine-iaḡimito-ḡoi tarimari ḡotuḡamaḡiri. Ġia na Barau ḡena guruḡa ḡemi ḡekiraḡito. Ġia ḡeri maḡuri na kara ḡefoforito eiaḡoto mo ḡea maseto boḡono tuḡamaḡiri, ema ḡia ḡeri veḡabidadama boḡono tovotovori.

8 Iesu Keriso tu ḡoraḡani, toma, ema vanaḡivanaḡi asi beirauni.

9 Vevaḡa-riba irauirauri na dabara moḡonina na asi beḡene ḡori-veḡitami. Namona tu Barau ḡena varevare-bara na ḡita iaukara bene vaḡa-kokoreri. Ġaniḡani taravaturi irauirauri na ḡita iaukara tu asi beḡe vaḡa-kokorerini. Moḡeri taravatu ḡekorana-iaḡirito-ḡoi tarimari tu namo ta asi ḡeḡoitaḡoato.

10 Ġita tu ma ḡera fata veaḡana. Senaḡina Barau toma-rakariḡona ḡana farai rubuna nuḡanai gini-taḡo ḡauveiri ḡeveito-ḡoi tarimari tu mai fatai asi beḡe ḡaniḡanini.

11 Rubu Vevaḡa verena baregona na boromakau, nanigosi, mamoe evaḡirito-ḡoi nai, tauḡaniri tu eḡabi-rosirito-ḡoi Isaraela tarimari ḡeri totoḡa gabuna na, benamo murikai vau ea gaburito-ḡoi. Rarari moḡo Vevaḡa Lelevaḡi Gabunai eḡabitoḡarito-ḡoi, rakava ḡabiveḡitari varevarena bene vei-iaḡiri ḡana.

12 Moḡesina naima Iesu maki rarana na tarimarima bene vaḡa-veaḡari ḡana tu, Ieruselema vanuḡa barana maḡuna murikanai emidigu-midiguto.

13 Moġa lorinai ġita maki Iesu ġenai totoġa murikana ġana siraka-rosi. Be, ġia na eġabiatu maiakana ġita na maki bitana ġabia.

14 Korana mainai ġita tu asi ġera tanu-vanaġivanaġi vanuġana. A ġita tu vanuġa vau ma beiaġomani dagarana tavetauani.

15 Moġa lorinai vanaġivanaġi Barau vonevone-raġena varevareri Iesu ġenana bitana vini-raġea Barau ġenai. Barau arana vonevone-raġena tu ġita murura ġwaġwana.

16 Veiġa namori veiveiri asi boġono tuġa-rekwari, ema ġemi ai guruġa moġoniri manġeri karomi ġeri maki boġono kiraġi. Korana tu manġesina veiġari tu ġinitaġo dagarari namori Barau na eiaku-iaġirini.

17 Ġequine-iaġimini tarimari garori boġono seġaġiri, ema ġeri veġorikau maorona gaburenai boġono tanu. Korana ġia na tu ġomi ġemi maġuri ġeġita-ġaurini, ema ġomi ġemi maġuri aiġesina Barau ġenai beġea kiraġirini. Garori boġono seġaġiri, be ma iakuri ġesi ġeri ġauvei beġene veia, a dia nuġari ma metori ġesi. Korana bema nuġari ma metori ġesi ġomi beġe narimini nai tu, ġomi na namo ta asi boġo doġariani.

18 Ġema boġono ġuriġuri. Ġai ribama ġai nuġama tu veiareva Barau ġoiranai, ema ġema ura barana tu vegubakau ai moġo baġana tanu.

19 Ġegu noġinoġi barego lelevaġina ġomi ġemi ai tu boġono ġauġau, be ġemi ai ma bana ġenoġoi-ġariġari.

20 Maino Barauna na ġera Vereġauka Iesu tu betanu-vanaġi vanaġini ġinitaġo rarana ġenana

ma evaḡa-maḡuri ḡenoḡoiato. Iesu tu mamoe nari tarimana baregona.

²¹ Mai maino Barauna na dagara namori mabarari bene vinimi, ḡena ura boḡono veia ḡana. Ema kara ḡia na eiaku-iaḡirini dagarari Iesu Keriso ḡenana ḡita nuḡarai bene ḡauvei-iaḡiri. Mareva baregona tu ḡia ḡena bene iaḡo mo vanaḡivanāḡi. Amen.

²² Tarikakagu mabarami, anoḡimini, ḡegu vevaḡa-naḡi guruḡari maiḡeri boḡono ḡabi-raḡeri ma nuḡami namori ḡesi; korana fefa tu kubina moḡo batorea.

²³ Au aurani navaḡa-ribami, ḡita tarikakara Timoteo tu dibura numana na beḡe tuḡu-vaḡia. Bema ḡia bema raḡasi-ḡarimoḡini tu, tauma ru-aruva baḡa iaḡosini ḡitaḡitami.

²⁴ Ḡema vevaḡa-namo ḡemi veḡorikau tarimari ema Barau ḡena tarimarima veaḡari mabarari boḡono viniri. Itali tarimari na maki ḡemi vevaḡa-namo beḡe tuḡu.

²⁵ Barau ḡena namo e varevare-bara mabarami ḡemi ai bene tanu.

GINITAŌ VARIŪNA
The New Testament in the Sinaugoro Language of
Papua New Guinea
Nupela Testamen long tokples Sinaugoro long Niugini
Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 18 Apr 2025 from source files dated 31 Aug 2023
a998e4ce-f2f7-5577-968e-5d2feef358f1